

Biblia alang sa Kabataan motanyag



Ruth: Usa
ka Istorya
sa Gugma



Gisulat ni: Edward Hughes

Gihulagway ni: Janie Forest
Alastair Paterson

Gipahaom ni: Lyn Doerksen

Gihubad ni: Mel Lorell Abugho,
Cheryn Mabano Abugho

Gipagawas sa: Bible for Children
www.M1914.org

©2023 Bible for Children, Inc.

Pagtugot: Mahimo kang mokopya o mopatik niini
nga estorya, ayaw lang ibaligya.



Kon imong mahimamat ang imong dako-nga-apohan,
ang ilang mga ginikanan, ug ang tanang mga tawo nga
nag-una kanimo ug sa imong pamilya, tingali matingala
ka kon unsa sila nga klase sa mga tawo. Sa Bibliya,
ang usa sa tawhanong katigulangan ni
Jesus mao si Ruth - usa ka Moabihanon
nga babaye nga nagsimba sa mga idolo.



Ang istorya ni Ruth nagsugod sa Israel human sa panahon ni Samson, sa dihang ang mga katawhan sa Diyos mihunong sa pagsalig ug pagsunod sa Diyos. Usa ka makalilisang nga gutom ang miigo sa yuta. Nahibalo ba kamo kung unsa ang kagutom? Sakto na! Ang kagutom mao ang panahon nga walay bunga o mga tanom nga motubo, ug ang mga mananap ug usahay bisan ang mga tawo mamatay sa kagutom.



Usa ka lalaki, si Elimelec, mibiya sa Betlehem uban sa iyang asawa ug duha ka anak nga lalaki, nga nangitag pagkaon. Miadto siya sa Moab, usa ka nasod diin ang mga tawo nagsimba sa mga diosdios.



Dili maayo
ang kahimtang
ni Elimelec ug ang iyang pamilya sa Moab.
Namatay siya, gisundan sa iyang duha ka anak
nga lalaki.



Ang iyang asawa, si Noemi, ang nahibilin, uban sa
duha ka asawa sa mga anak nga lalaki, si Ruth ug
Orpha. Ang duha ka babaye gikan sa Moab.



Si Noemi, nga karon usa na ka balo, siya nakadungog nga ang Ginoo miduaw sa Iyang katawhan, ug naghatag kanila ug pan. Nakahukom siya nga mobalik sa iyang yutang natawhan. Apan unsay buhaton sa duha ka babaye?

Gitambagan ni Noemi ang duha ka babaye nga magpabilin sa Moab ug magminyo pag-usab.



Si Orpha mibalik sa iyang kaugalingong pamilya. Apan si Ruth mibalibad. Hinoon, si Ruth misulti og nindot nga balak nga nagsaad nga dili niya biyaan ang iyang ugangan nga babaye.







Ang mga karaang higala ni Naomi nalipay nga siya mopauli na sa Betlehem. Apan iyang gihangyo sila nga tawgon siyag "Marah" (mapait) imbes nga Naomi (malipayon). "Kay ang Makagagahum nagbuhat kanako sa mapait gayud." Mibalik si Noemi nga walay dala - gawas kang Ruth.



Bisan tuod si Ruth nagsimba sa mga idolo sama sa kadaghanan sa mga tawo sa Moab, siya mitalikod niana aron sa pagsimba sa Buhi nga Diyos sa Israel. Si Ruth naningkamot pag-ayo sa pag trabaho aron sa pagsiguro nga si Noemi adunay igo nga makaon. Kada adlaw ginasunod niya ang mga mangangani sa uma ug ginakuha niya ang nabilin nga mga lugas.





Si Boaz, ang tag-iya sa uma, nakadungog sa pagkamaayo ni Ruth sa iyang ugangan nga babaye. Sa dihang nahimamat niya siya, gitabangan siya ni Boaz pinaagi sa pagsugo sa iyang mga mangangani nga magbilin ug pipila ka kumkom sa lugas nga tinuyo. Si Boaz nagsugod na sa pagkagusto kang Ruth.





Sa dihang gisultihan ni Ruth si Noemi bahin kang Boaz ug sa iyang kaayo, ang tigulang nga babaye nagdayeg sa Diyos. "Ang lalaki paryente namo, usa sa among duol nga kabanay."






Sa paglabay sa panahon, gusto ni

Boaz nga minyoan si Ruth ug atimanon si Noemi ug ang yuta sa iyang pamilya. Apan ang laing duol nga paryente adunay unang higayon. Gusto niining tawhana ang yuta - apan dili niya gusto si Ruth nga mamahimo niyang asawa. Ang balaod nag-ingon nga dili niya mahimo ang usa kung wala ang uban.



Niadtong mga panahona, ang mga tawo dili makipaglamano aron sa paghusay sa usa ka kasabutan. Gihubo ni Boaz ang usa ka sandal ug gihatag kini sa publiko ngadto sa laing tawo. Ang negosyo nahusay.



Si Ruth mamahimo na niyang asawa. Ug karon siya ug si Noemi may bahin na sa pamilya ni Boaz.





Gitawag ni Boaz ug
Ruth ang ilang unang
anak nga lalaki nga si
Obed. Mamahimo
siyang apohan ni
David, ang dakong
Hari sa Israel.



Apan ang mas nindot pa, ang batang si Obed mao ang katigulangan sa atong Ginoong Jesukristo. Si Jesus miabot pinaagi sa linya sa pamilya ni David nga mamahimong Hari sa mga Hari ug ang Manluluwas sa kalibutan.



Ruth: Usa ka Istorya sa Gugma

Estorya gikan sa Pulong sa Dios, ang Biblia,

makita sa

Ruth

"Ang pag-abot sa Imong mga Pulong
nagahatag og kahayag." Salmo 119:130





Ang Kataposan



Kini nga estorya gikan sa Biblia nagasulti kanato bahin sa kahibulongan nga Dios nga nagbuhat kanato ug gusto Niya nga kita makaila Kaniya.

Nahibalo ang Dios nga nakabuhat kitag daghang daotan. Gitawag Niya kini nga sala. Kamatayon ang silot sa sala. Pero nahigugma pag-ayo ang Dios kanato. Iyang gipadala ang bugtong Niyang Anak nga si Jesus aron mamatay sa Krus ug silotan tungod sa imong mga sala. Unya nabanhaw si Jesus ug mibalik sa Langit! Kon motuo ka kang Jesus ug mohangyo nga pasayloon ka sa imong mga sala, himoon kana Niya! Moanha Siya ug mopuyo sulod kanimo karon, ug mopuyo ka uban Kaniya hangtod sa kahangtoran.

Kon motuo ka nga kini ang tinuod, ingna ang Dios:
Ginoong Jesus, ako nagatuo nga Ikaw Dios, ug nahimong tawo aron mamatay alang sa akong mga sala, ug karon Ikaw nabuhi pag-usab.

Anhi sa akong kinabuhi ug pasayloa ang akong mga sala, aron mabag-o ang akong kinabuhi karon, ug unya makig-uban ako Kanimo hangtod sa kahangtoran. Tabangi ako nga motuman Kanimo ug magkinabuhi alang Kanimo ingon nga Imong anak. Amen.

Basaha ang Biblia ug pakigsulti sa Dios kada adlaw! Juan 3:16

